

BOSNA I HERCEGOVINA
Federacija Bosne i Hercegovine
UNSKO – SANSKI KANTON
Skupština



BOSNIA AND HERZEGOVINA
Federation of Bosnia and Herzegovina
UNA – SANA CANTON
Assembly

Poslanička pitanja

sa XI redovne sjednice Skupštine Unsko – sanskog kantona
koja je održana 09.10.2015. godine

Bihać, 09. oktobar 2015. godine

Predsjedavajući Skupštine Unsko – saskog kantona, Nijaz Hušić:

Ja molim zastupnike da se prijave za današnja poslanička pitanja ko ima. Prvi za zastupničko pitanje prijavio se kolega Željko Mirković. 10 zastupnika za sad prijavljenih. Dakle, ja vas molim 3 minute. Izvolite.

Poslanik Željko Mirković:

Gospodine Predsjedavajući, uvažene kolegice i kolege, predstavnici Vlade, cijenjeni ministri, dragi gosti, predstavnici medija i naši građani koji nas slušate i pratite putem Radio – Televizije Unsko – saskog kantona, sve vas skupa pozdravljam.

Za današnju sjednicu Skupštine Unsko – saskog kantona ja imam dva pitanja. Prvo pitanje upućujem Zavodu zdravstvenog osiguranja Unsko – saskog kantona:

Radi čega je došlo do zastoja po pitanju distribucije lijekova sa esencijalne liste, što za posljedicu ima da najugroženije kategorije građana, penzioneri i nezaposleni, ne mogu dobiti lijekove sa esencijalne liste? Da li se preko leđa pacijenata svode računi između podobnih i nepodobnih dobavljača, s ciljem ostvarivanja monopola kada je distribucija lijekova u pitanju?

Ovo pitam iz razloga što imam saznanja da se određenim apotekama izmiruju potraživanja, a drugima ne izmiruju, unatoč zakonskom roku od 90 dana koji je davno premašen.

Drugo pitanje upućujem Federalnom Zavodu za zapošljavanje.

Da li se na području Federacije BiH, odnosno na teritoriji nadležnih kantonalnih službi svih deset kantona, nalaze na evidenciji nezaposlenih visoko obrazovane osobe sa završenim medicinskim fakultetom ili višim stepenom obrazovanja medicinske struke specijalističkog usmjerenja? Ako postoji ova kategorija nezaposlenih, tražim da mi se dostavi broj istih precizno navedenih po kantonima i naznačenim vremenom čekanja na posao.

Hvala lijepo.

Predsjedavajući Skupštine Unsko – saskog kantona, Nijaz Hušić:

Zahvaljujem. Farko Hodžić, zastupničko pitanje. Neka se pripremi kolega Mušanović.

Poslanik Farko Hodžić:

Poštovani, sve vas srdačno selamim i pozdravljam. Pošto je 3 minute, neću dalje.

Prvo ću jedan komentar. Dobio sam odgovor na poslaničko pitanje koje sam postavio ministarstvu finansija, a radi se o isplatama po grantovima. U odgovoru kaže da se dostavi mail, da bi se meni dostavilo to. Snimite mi na CD i dajte mi odgovor. Dajte mi odgovor što sam tražio. I drugo, želim da zahvalim zavodu gradskom Općine Bihać, jer sam postavio ono pitanje oko postavljanja jednog ogledala. To su uradili i hvala im u ime građana Repušina u Bihaću.

Moje poslaničko pitanje. Naime, Skupština ova je donijela Odluku o zabrani zapošljavanja i ta odluka nije stavljena van snage. Tražim od Vlade i svih onih koji kontrolišu taj dio, da mi se dostavi tačna informacija koliko je to zaposleno poslije odluke Skupštine Unsko – sanskog kantona.

Hvala lijepa.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Mušanović. A neka se pripremi kolega Mahić.

Poslanik Admir Mušanović:

Uvaženi Predsjedavajući, dame i gospodo poslanici, ministri u Vladi, predstavnici medija, gosti, koristim priliku da vas sviju selamim i pozdravim.

Tražim od Ministarstva finansija Unsko – sanskog kantona i Vlade Unsko – sanskog kantona da u roku od 15 dana zatraže od Porezne Uprave Federacije BiH spisak svih primanja sa budžeta Unsko – sanskog kantona, kao i sva primanja u svim javnim ustanovama, fondovima i javnim preduzećima u vlasništvu Unsko – sanskog kantona u proteklih 12 mjeseci, te da se spisak dostavi nama zastupnicima i javno objavi po uzoru na spisak koji je objavljen o platama na Federalnom nivou 2013-e godine.

Smatram da građani, kao vlasnici budžetskog novca, imaju pravo znati ove informacije. Mišljenja sam da ne postoji nikakva prepreka za ovo, s obzirom da je sličan spisak objavljen kada je riječ o platama sa Federalnog nivoa, te da nije bilo nikakvih konsekvenci nakon objave.

I drugo poslaničko pitanje. Tražim od Vlade Unsko – sanskog kantona u aktuelnom mandatu da mi dostavi:

1. Koliko podzakonskih akata po donesenim zakonskim rješenjima od strane Skupštine Unsko – sanskog kantona su resorna ministarstva Vlade Unsko – sanskog kantona bila dužna izraditi i utvrditi i propisati?
2. Koliko ih je urađeno i koji su to podzakonski akti?
3. Koliko ih je ne urađenih i koji su to podzakonski akti?

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Sanel Mahić. A neka se pripremi zastupnik Muslić.

Poslanik Sanel Mahić:

Uvaženi Predsjedavajući, zamjeniče, ministri u Vladi Unsko – sanskog kantona, kolegice i kolege u Skupštini, uvaženi gosti, ja vas sve skupa srdačno selamim i pozdravljam.

Iskoristio bih prvo priliku da čestitam 20 godina slobode svojim sugrađanima, dakle građanima Sanskog Mosta.

I da postavim pitanje ministarstvu zdravstva, rada i socijalne politike.

Na koji način se vrši promocija usluga fonda solidarnosti, odnosno prava koja građani ostvaruju kod ovog fonda, te koliko je sredstava prema posljednjim raspoloživim podacima sa područja Unsko – sanskog kantona uplaćeno u ovaj fond, a koliko je utrošeno za liječenje stanovništva Unsko – sanskog kantona?

Ovo govorim obzirom na samu svrhu i postavljam ovo pitanje obzirom na samu svrhu fonda i na nemogućnost naših građana da povlače sredstva koja jesu namjenjena dakle za liječenje naših građana van kantona i van države, a obzirom da dosta stanovništva nije ni upoznato da ima ovu mogućnost. Ja se sjećam prilikom donošenja nekih pomoći i ministar Murić tadašnji, kolega sada, je nas upozoravao i upoznao da postoje sredstva dakle sistemski rješenja za ove namjene. Međutim, svjedoci smo svakodnevnog prikupljanja pomoći kada su u pitanju razne bolesti koje zadese naše sugrađane. I svakako, mi smo plemenit narod, mi se odazivamo tim pomoćima, međutim trebamo dati ljudima do znanja da imaju mogućnost korištenja zakonom predviđenih sredstava. I mislim, ukoliko su prepreke nepostojanje zdravstvenog osiguranja, da je rađe za 200 – 300 konvertibilnih maraka ostvariti to pravo, a ne plaćati desetine hiljada maraka za eventualne operacije. Tako da mislim da bi bilo dobro izvršiti ovu promociju. Ovo pitanje više postavljam zbog samog upoznavanja ljudi na način, kako to ministarstvo ili zavod zdravstvenog osiguranja, ili ovaj fond, smatraju da treba da učinimo.

Hvala.

Predsjedavajući Skupštine Unsko – sanskog kantona, Nijaz Hušić:

Albin Muslić. A neka se pripremi kolega Jusić.

Poslanik Albin Muslić:

Uvaženi Predsjedavajući, zamjenici Predsjedavajućeg, kolegice i kolege poslanici, predstavnici Vlade Unsko – sanskog kantona, nevladinog sektora, medija, sindikata, uvaženi građani.

Imam dva poslanička pitanja. Prvo se odnosi, zapravo upućeno je prema Ministarstvu zdravstva, rada i socijalne politike kantona.

A tiče se izvršavanja ugovorom preuzetih obaveza u pogledu plaćanja kako državnim, tako i privatnim apotekama, a po osnovu izdatih lijekova po osnovu esencijalne liste. Jer imamo informacije da se ta plaćanja po osnovu ugovora koji postoji između kako javnih tako i privatnih apoteka, ne izvršava od strane Zavoda zdravstvenog osiguranja, te pojedine apoteke već prijete sa tužbama, čak imam informaciju da su neke i podnijele tužbu, što će vrlo vjerovatno u krajnjoj liniji, slučaju, negativnog ishoda po Zavod zdravstvenog osiguranja, opteretiti dodatno budžet Unsko – sanskog kantona.

Drugo pitanje postavljam u ime građana mjesne zajednice Bućevci iz općine Bužim, a usmjereno je prema Ministarstvu obrazovanja, nauke, kulture i sporta kantona.

A tiče se da li će u budžetu za 2016-u godinu biti predviđena sredstva za apsolutnu rekonstrukciju zgrade Područne Škole Osnovne Škole Bužim, budući da ista se nalazi u katastrofalnom stanju, a da u proteklom periodu su postojala brojna obećanja brojnih institucija, UNDP-a i drugih segmenata, međutim ta škola je i danas u jako neuvjetnim, u neuvjetnim uvjetima se radi, te je u pitanju i sam nastavni proces, a da ne govorimo zdravlju samih učenika i nastavnika.

I na kraju, izražavam nezadovoljstvo što nisam dobio odgovor na poslaničko pitanje kojeg sam uputio 13.07.2015 godine, a upućeno prema ministarstvu privrede, a tiče se kada će Vlada Unsko – sanskog kantona u Skupštinsku proceduru uputiti plan i program privrednih aktivnosti i set zakonskih propisa, koji će za cilj imati stvaranje boljeg privrednog ambijenta, te zapošljavanje na Unsko – sanskom kantonu.

Hvala lijepa.

Predsjedavajući Skupštine Unsko – sanskog kantona, Nijaz Hušić:

Nisvet Jusić. A neka se pripremi kolega Keserović.

Poslanik Nisvet Jusić:

Članovi radnog Predsjedništva, kolegice i kolege poslanici u Skupštini Unsko – sanskog kantona, ministri u Vladi, predstavnici medija, sindikata, cjenjeni gosti, građanke i građani Unsko – sanskog kantona, eselamu alejkum i dobar dan.

Na osnovu Poslovnika o radu Skupštine Unsko – sanskog kantona Član 190, upućujem poslaničko pitanje Javnom Preduzeću BH POŠTA DOO Sarajevo.

Zašto je Javno Preduzeće BH POŠTA DOO Sarajevo donijelo odluku o prestanku redovnog rada poštanske jedinice Konjodor, poštanski broj 77249 i predstavlja li to prvi korak ka potpunom prestanku vršenja poštanskih usluga i gašenju ove poštanske jedinice?

Obrazloženje. Nakon što je Centar pošta Bihać uputio obavijest građanima kojom obaviještava korisnike poštanskih usluga u poštarskoj jedinici Konjodor da ista prestaje sa radom, te da će građanima na usluzi biti mobilna pošta u dva termina sedmično, obratio mi se veliki broj građana koji izražavaju duboku zabrinutost i ne slaganje zbog ovakve odluke. Poštanske usluge u poštarskoj jedinici Konjodor 20 godina pružane su u neuslovnom objektu, kontejneru, koji je izgledom i dojmom veoma negativno djelovao na opredjeljenje građana da koriste poštanske usluge. U ovoj poštarskoj jedinici gravitira više od 3000 stanovnika koji su se osjećali diskriminirani zbog uvjeta koje su imali prilikom korištenja poštanskih usluga. Zbog neadekvatnog prostora vjerujem da ni pošta nije bila u mogućnosti ponuditi puni asortiman svojih usluga građanima, što se negativno odrazilo na njene poslovne rezultate. S namjerom da pomogne podizanju standarda života svojih građana, mjesna zajednica Konjodor je još 2010-e godine ponudila zemljište uz samu zgradu mjesne zajednice u neposrednoj blizini ambulante i osnovne škole, kao lokaciju za izgradnju čvrstog objekta pošte. Uz saglasnost Općinskog Pravobranilaštva Općine Bužim provedena je procedura donošenja odluka cijepanja parcela i tako dalje. Međutim, iako je više puta najavljena izgradnja adekvatnog objekta za potrebe ove poštanske jedinice, Javno Preduzeće BH POŠTA Direkcija Bihać nije konkretizirala realizaciju ovog projekta, već je pristupila reduciranju i ukidanju poštanskih usluga građanima.

Drugo pitanje je u biti identično sa ovim što je uvaženi kolega Muslić prije mene postavio. Dakle, radi se o stanju u kojem se nalazi područna škola u mjesnoj zajednici Bućevci, kao Područna Škola Osnovne Škole Bužim, koja je škola koja ima najveći broj učenika. S tim u vezi, izdana je urbanistička dozvola, pripremljeni su dakle osnovni uvjeti da se može pristupiti sanaciji ili ponovnoj izgradnji objekta koji će biti adekvatan za djecu koja pohađaju nastavu u tom području. S tim u vezi dakle evo i ja tražim informaciju o raspodjeli granta koji se odnosio na saniranje školskih objekata u ovoj godini, dakle u budžetu Unsko – sanskog kantona, te da li je ta raspodjela urađena? Smatram da bi dobar dio tog novca trebao biti raspoređen upravo za sanaciju uvjeta, odnosno omogućavanje normalnog rada u ovoj školi.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Keserović. A neka se pripremi kolega Ćufurović.

Poslanik Kenan Keserović:

Dobar dan. Pozdravljam sve prisutne.

Za današnju sjednicu imam jednu inicijativu i jedno poslaničko pitanje.

Na temelju Člana 84. Poslovnika Skupštine Unsko – sanskog kantona upućujem inicijativu za stavljanje u proceduru po skraćenom postupku i usvajanje strategije i uključivanje djece s poteškoćama u razvoju u obrazovanje sa sedmogodišnjim planom implementacije, znači prema ministarstvu obrazovanja, nauke, kulture i sporta, Vladi Unsko – sanskog kantona i Skupštini Unsko – sanskog kantona.

Naime, tokom prošle godine, a intenzivno od oktobra 2014-e do aprila 2015-e godine, na području Unsko – sanskog kantona proveden je projekat jačanja socijalne inkluzije djece sa poteškoćama u razvoju u obrazovni sistem Unsko – sanskog kantona, u partnerstvu znači resornog ministarstva i Međunarodne Organizacije SAVE THE CHILDREN, znači intrenacional. Ključne aktivnosti projekta bile su usmjerene na razvoj sistema podrške djeci sa poteškoćama i ciljem razvoja inkluzivne prakse. A ono što je jako bitno, da također je prema podacima resornog ministarstva, u školskoj godini znači 2013 – 2014, ukupno bilo 650 učenika sa poteškoćama upisanih u redovno obrazovni sistem.

Obzirom da je prošlo gotovo 5 mjeseci od predavljanja strategije i njenih ciljeva, koje je održano znači 21.05.2015 godine, a zbog potrebe strateškog pristupa rješavanja nagomilanih problema s kojima se suočavaju danas djeca sa poteškoćama u razvoju u obrazovnom sistemu, tražim da se u prvoj polovini mjeseca novembra ove godine u proceduru po skraćenom postupku uputi navedena strategija.

A drugo znači imam, znači poslaničko pitanje, koje upućujem prema Kantonalnom Ministarstvu zdravstva i socijalne politike, prema znači ministru.

Naime, veći broj građana Velike Kladuše zadnjih mjeseci se žali na dugo čekanje radi ostvarivanja radiološke, ultrazvučne, pa pravovremeno i laboratorijskih i dijagnostičkih pretraga u Domu Zdravlja Velika Kladuša, zbog nedostatka kadra i tehničkih mogućnosti. Nedopustivo je da građani Velike Kladuše, osigurano lice sa plaćenom premijom, čeka 2 do 3 mjeseca da bi ostvario iste, a prema informacijama kojim raspoložem jedan od velikih problema predstavlja lista čekanja na ultrazvučni pregled koja je popunjena u naredna 3 mjeseca. Obzirom na velik broj pacijenata koji je evidentan u Domu Zdravlja Velika Kladuša, te značajan porast, raznolikost i kompleksnost oboljenja, smatram da ovako ophođenje prema ovoj problematici je neadekvatno.

Moje pitanje konkretno je da li Vi ministre možete riješiti problem preko upravljačko – rukovodnih struktura Doma Zdravlja Velika Kladuša i vašeg ministarstva, preduge liste čekanja znači na radiološke, ultrazvučne, laboratorijske i druge dijagnostičke procedure u Domu Zdravlja Velika Kladuša i kad?

U prilogu pismenog odgovora molim da mi se dostave i odluke koje pokrivaju gore navedenu oblast.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Ćufurović. A neka se pripremi Bašagić.

Poslanik Asmir Ćufurović:

Uvaženi Predsjedavajući, Sekretaru, ministri u Vladi Unsko – sanskog kantona, cjenjene zastupnice i kolege zastupnici, predstavnici nevladinog sektora, Međunarodne Zajednice, gosti, građani Unsko – sanskog kantona, ja vas selamim i pozdravljam.

Na samom početku pridružiću se čestitakama povodom 20 godina slobode građanima Sanskog Mosta.

Moje pitanje je upućeno ministarstvu, odnosno Vladi, ali direktno ministarstvu zdravstva, rada i socijalne politike.

Zašto Vlada Unsko – sanskog kantona kasni sa imenovanjem upravnog odbora Doma Zdravlja u Velikoj Kladuši?

Obrazloženje. Imali smo priliku vidjeti da su u posljednje vrijeme završena sva imenovanja na području Unsko – sanskog kantona kad su u pitanju domovi zdravlja, osim u Velikoj Kladuši. Mandat upravnog odbora, privremenog, u ovoj instituciji je istekao 30.06.2015 godine. Raspisan je konkurs, zatvoren 06.06. Ono što ja želim ovdje ukazati Vladi, da je znači privremeni upravni odbor imenovao VD-a 27.04.2015 i da 27.10. mandat VD-u ističe, te da procedura oko imenovanja, odnosno raspisivanja konkursa za direktora nije ni pokrenuta. S toga, Vlada uveliko kasni i mislim da je vrijeme da se urgentno po ovom pitanju djeluje.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Kolega Edin Bašagić. A neka se pripremi kolega Mladen Lonić.

Poslanik Edin Bašagić:

Poštovani Predsjedavajući, članovi Vlade, kolegice i kolege, sviju vas, ostali prisutni, sviju vas selamim i pozdravljam.

Prvo bih izrazio zadovoljstvo, ako se osvrnemo na prošlu sjednicu, zadovoljstvo rješavanjem tako da kažem problema rada osnovnog i srednjeg obrazovanja i predškolskog, što je Vlada postigla dogovor sa sindikatima. Ako se sjetimo, okrenemo se na prošlu sjednicu, bilo je svakakvih ovdje komentara.

Pa još jedno pitanje što se tiče konkretno ministarstva obrazovanja, koje je riješeno, a ja sam prije nekoliko sjednica uputio jedno poslaničko pitanje, a vezano za Višu Medicinsku Školu. Znači škola koja je 10 godina bila škola problem, škola slučaj. Riješena. Eto riješen problem, ako se može nazvati, odnosno problem štrajka i rada naših profesora. Tako da izražavam svoje zadovoljstvo dogovorom i radom ministarstva obrazovanja i cjelokupne Vlade. I nadam se da će se takvim tempom nastaviti rješavanje svih problema koji su dugo godina bili nagomilani, a primjer nam je ova Viša Medicinska Škola koja je 10 godina stajala i stvarala problem kako ekološki, tako i svake druge prirode.

Slično poslaničko pitanje je vezano sa tim, sa ovakvim stanjem kao što je Viša Medicinska Škola, a tiče se privatnih objekata, odnosno upućujem ga ministarstvu prostornog uređenja i nadležnoj inspekciji.

Šta se radi u prevenciji problema ekoloških sa privatnim objektima koji su napušteni, koji su ruševine, a koji stvaraju kako građanima koji žive u neposrednoj blizini, tako i drugim građanima?

Naime, meni se obratilo više naših građana, poglavito vezano za, koji stanuju u mjesnoj zajednici Pritoka, gdje je veliki broj objekata napušten, odnosno ne vodi se računa o tome, to su ruševine, koje pogotovo u ljetnom periodu, ima tu dosta zmija. A da ne kažem problem ruševina ako se sjetimo kako se incidenti sa djecom dešavaju, u Sarajevu vidjeli smo na onom sportskom igralištu. Da ne kažem u kakvom su stanju ti objekti. I znači konkretno pitanje ministarstvu prostornog uređenja i našoj nadležnoj inspekciji.

Šta se radi, odnosno da li se upućuju kakve opomene, ili kakve su nadležnosti inspekcije da se jednostavno uputi opomena, kako privatnim vlasnicima, tako i ako je to društvena imovina, nadležnim institucijama, da se spriječe neželjene posljedice?

Hvala.

Predsjedavajući Skupštine Unsko – sanskog kantona, Nijaz Hušić:

Mladen Lonić, nije tu. Šušić Merisa. A neka se pripremi Amir Murić.

Poslanica Šušić Merisa:

Selamim i pozdravljam sve prisutne.

Koristim priliku takođe da čestitam svojim sugrađanima Sanskog Mosta Dan Oslobođenja.

Upućujem pitanje ministru za boračka pitanja i tražim odgovor odmah danas usmeno.

Da li su isplaćene boračke stipendije za prethodnu školsku godinu i da li su predviđena sredstva za dodjelu istih za ovu školsku godinu?

Obzirom dakle da mi se obratio veći broj studenata koji imaju uslove da apliciraju za dodjelu boračkih stipendija, a iz razloga znači što su dobili informaciju od BIZ-ova iz svojih općina da nema sredstava za dodjelu istih, znači molim ministra ukoliko je u mogućnosti da mi odgovori odmah.

Hvala.

Predsjedavajući Skupštine Unsko – sanskog kantona, Nijaz Hušić:

Amir Murić. A neka se pripremi kolega Samir Veladžić.

Poslanik Amir Murić:

Dame i gospodo dobar dan.

Ja sam prošle sjednice dobio odgovor na moj upit, da li je u Domu Zdravlja u Bihaću raspisan konkurs mimo zakonskih propisa i od ministarstva zdravstva sam dobio odgovor da jeste i da je taj konkurs poništen. Evo danas sam dobio odgovor predsjednika privremenog upravnog odbora da taj konkurs nije poništen, da je on zatvoren 23.07.2015 godine i da se na taj konkurs nije niko ni prijavio i da nema potrebe da se poništava. Moje pitanje je bilo da li je raspisan mimo zakonskih propisa? I dalje ostaje to pitanje. I sad ću ga proširiti, na upit ministarstvu zdravstva.

Da li je tamo postaljen VD direktora, na koji period i da li je taj period mimo zakonskih propisa prošao? A znamo da najviše može biti VD direktora 6 mjeseci.

Moje pitanje je kad je imenovan VD direktora u Domu Zdravlja Bihać i da li je prošlo ovih 6 mjeseci, da li je imenovan novi VD direktor?

I drugo pitanje, ustvari bila bi inicijativa. Ja sam kao šef centra mentalnog zdravlja u Domu Zdravlja Cazin poslao jedan dopis ministarstvu zdravstva i u tom dopisu postavio pitanje, da li ministarstvo zdravstva može osigurati preko odluke naše kantonalne, duševne bolesnike, teške duševne bolesnike i ovisnike o teškim opojnim sredstvima. Svi dobro znate da je naša država krenula u reformu zdravstva i da je kad je u pitanju duševno zdravlje otišli smo daleko naprijed ispred regije, kad uzmemo Hrvatsku, Srbiju, Crnu Goru. I bilo bi šteta da na našem

kantonu funkcionira šest centara za mentalno zdravlje i bilo bi šteta da mi ne odrađujemo onaj posao za koji smo i formirani, zbog toga što ti ljudi ne mogu dolaziti i tražiti zdravstvenu zaštitu i nemaju osiguranja. A vrlo dobro znamo da su to dvije rizične grupe i da oni pored toga što su sami bolesni, oni donose i druge socijalne probleme na našem kantonu, ako se ne liječe.

Znači bila bi inicijativa, da naše Kantonalno Ministarstvo zdravstva proširi odluku kantonalnu koja postoji za određene grupe bolesti i da stavi na tu odluku duševne bolesnike i ovisnike o teškim opojnim drogama.

Hvala.

Predsjedavajući Skupštine Unsko – saskog kantona, Nijaz Hušić:

Zahvaljujem. Veladžić Samir. A neka se pripremi kolega Prošić.

Poslanik Samir Veladžić:

Selamim i pozdravljam sve prisutne. Posebno danas pozdravljam predstavnike aktiva razredne nastave, koji su ovdje danas naši gosti.

S obzirom da ovih dana pojedini neodgovorni politički zvaničnici na području općine Bužim, neargumentirano, neosnovano, bez i malo osjećaja odgovornosti, iznose javno neistine o tome kako su zastupnici u ovoj Skupštini, a koji su kandidirani iz ove izborne jedinice, skinuli ili onemogućili realizaciju nekoliko stotina hiljada konvertibilnih maraka namjenjenih izgradnji sportske dvorane u općini Bužim. Neću ovom prilikom postavljati i druga otvorena pitanja o kojima će vjerovatno u narednom periodu biti prilike da se priča za ovom govornicom, nego ću samo s ciljem istinitog informiranja javnosti, u općini Bužim pogotovo, zadržati se na slijedećem pitanju koje upućujem najrelevantnijoj i nadležnoj adresi, a to je Ministarstvo finansija Unsko – saskog kantona, odnosno sam ministar finansija, koji je evo i prisutan ovdje danas u Sali, a pitanje glasi:

Da li je u ovom budžetu Unsko – saskog kantona i na kojem kodu ili u okviru bilo kojeg ministarstva bilo planirano namjenskih sredstava za izgradnju sportske dvorane u općini Bužim? Da li je takvih sredstava bilo planirano u budžetu i prethodnih nekoliko godina i ako je bilo, kada i kojom odlukom ove Skupštine, ovog saziva Skupštine, su ta sredstva skinuta?

Pošto je ovdje prisutan ministar finansija, ja ga molim da na ovo pitanje odgovori odmah i usmeno. Mislim da bi on mogao raspolagati sa ovakvim informacijama.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Ekrem Prošić. A još za zastupničko pitanje se prijavio kolega Kadirić.

Poslanik Ekrem Prošić:

Kolegice i kolege poslanici, predstavnici Vlade, predstavnici medija, gosti, sve vas srdačno pozdravljam.

Ja sam zamoljen od strane mještana Bajrića, mjesna zajednica Stijena, da postavim jedno poslaničko pitanje, jer oni smatraju da su iscrpili puno stvari da riješe problem u svom naselju. Međutim, nisu do sada uspjeli, pa su pokrenuli i određenu peticiju, koju ja imam ovdje kod sebe, s kojom oni traže da se, kaže:

„Peticija kojom tražimo od nadležnih organa da zabrane i sankcionišu ilegalno spaljivanje guma i druge nezakonite radnje u vezi sa istima koje se vrše u halama nekadašnjeg Agrokomerca u Bajrićima a koje su veoma štetne i opasne za okolinu i život mještana“.

I onda su oni meni toga dosta objasnili i zamoli li me da i ja pojasnim o čemu se radi. Naime, ovdje izvjesni Sadik Karić iz Gračanice ili Lukavca je kupio hale u naselju Bajrići, koje su nekada pripadale Agrokomercu i od aprila mjeseca nelegalno vrši spaljivanje guma, mljevenje i spaljivanje guma na tom području. Ništa čudno ne bi bilo da on ima za to dozvolu da radi. On nema nikakve dozvole. Mještani su to sve provjerili, isprovjeravali i onda su se nakon toga počeli obraćati nadležnim organima. Ja se izvinjavam, neke fotografije imam. Naime, znači oni su se obratili komunalnom inspektoru, Selimović Said čini mi se da se zove, normalno da je taj inspektor iz mjesne zajednice Polje, kako oni kažu, i naš načelnik u Cazinu, zatim su obavještavali komunalne redare, zatim su se obratili načelniku, pa su se obraćali gospodinu Hadžipašiću. I oni smatraju da su svi ovi ljudi uključeni u ovu rabotu koja se tamo dešava i određeni Cazinski biznismeni. Naime, oni tvrde da je taj gospodin tamo negdje u Lukavcu pokušao otvoriti tu spalionicu i da nije mogao dobiti potrebne dozvole jer je to štetno za zdravlje građana. I onda su ovi naši, vlasti iz Cazina, onda su ga doveli u Cazin da otvori to, a sve s ciljem, kako oni tvrde, ostvarivanja interesa određenih Cazinskih firmi, jer proizvod koji oni dobijaju topljenjem te gume se može koristiti znači kao dodatak rudi ili ne znam čemu već. Pa jedan dio se navodno vozi u cjementaru u Lukavcu, a drugi koristi firma I CRNI CIGLANA u Cazinu. I oni tvrde da iza toga stoje znači i načelnik i Hadžipašić i vlasnik ove firme.

(PREKID POSLANIČKOG PITANJA)

Predsjedavajući Skupštine Unsko – sanskog kantona, Nijaz Hušić:

Ja Vas molim da privodite kraju.

Poslanik Ekrem Prošić:

Imam ja dva pitanja, pa bih iskoristio jedno.

Predsjedavajući Skupštine Unsko – sanskog kantona, Nijaz Hušić:

Prošlo je vrijeme.

Poslanik Ekrem Prošić:

Ja bih iskoristio priliku, imam i fotografije, u krugu te firme gdje se vidi smeće, oko firme, a vidi se i kamion I CRNOG, koji je parkiran, koji odvozi i dovozi te gume. Naime, vlasnik tvrdi da ta firma ne radi, a radnici preskaču preko ograde, nekoliko njih kažu da imaju brade, da preskaču tamo i rade po noći sada i pune te hale koje ne koriste dimom i onda ih u toku dana pustaju da to tako smrdi, da jednostavno građani ne mogu izdržati. E sad navodno u CIGLANI da postoji neka oprema koja je iz Španije, koja se ne može koristiti u Evropskoj Uniji, pa sada onda se to koristi kod nas u Cazinu. I kada su građani pitali ovu gospodu, on je došao kući pa je nekima i prijetio i rekao im lično da nema nikakve dozvole i da mu ne treba, a da će prestati raditi sa ovim poslom kad mu onaj odozgo naredi. Uglavnom, radi se o vrlo ozbiljnoj stvari koja je znači štetna, čak tvrde da te smjese i ti dimovi su kancerogeni, koji se pustaju u atmosferu.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Kadirić.

Poslanik Nijaz Kadirić:

Poštovani gospodine Predsjedavajući, ministri, kolege zastupnici, dame i gospodo ispred Kluba Saveza za Bolju Budućnost sve vas srdačno selamim i pozdravljam.

Ja imam dva poslanička pitanja. Naravno, na početku želim da se pridružim čestitkama svim građanima Sanskog Mosta, 20 godina slobode.

Prvo poslaničko pitanje odnosi se, odnosno tražim odgovor od ministarstva zdravstva. Riječ je o opremi koja je donirana Općoj Bolnici Sanski Most iz Italije, koja prema informacijama od građana se apsolutno ne koristi i građani usluge i dalje traže u Prijedoru i Banja Luci.

Kada će ta oprema biti stavljena u funkciju?

Drugo poslaničko pitanje odnosi se, to je kolegica već pitala prije 6 mjeseci, međutim nikada, odnosi se na put Ključ – Sanski Most, Direkciji za ceste.

Kada će se izvršiti sanacija dijela puta mjesna zajednica Krasulje – Ramići?

Vozi se jednom trakom, ide zima, već skoro godinu dana taj put nije saniran. Kada će se izvršiti sanacija tog dijela puta?

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Hodžić Damir.

Poslanik Damir Hodžić:

Ja se izvinjavam što sam kasno prijavio.

To je jedno pitanje za ministarstvo privrede, a tiče se dva privredna društva na Unsko – sanskom kantonu. Jedno je Drvna Industrija Sanica. Mi smo ovdje od prilike prije godinu, godinu i pol dana, imali predstavnike te firme i onako spektakularno je najavljeno pokretanje u toj drvnoj industriji. Međutim, ne znamo da li se sada, barem ja ne znam, da li se tu išta uradilo po tom pitanju. Mislim da bi nama svima trebalo biti u interesu, jer kanton je na neki način vratio vlasništvo nad Drvnom Industrijom Sanica.

Evo tražim samo da se Skupštini dostavi informacija, i poslanicima, da li se proizvodi, da li radi ustvari Drvna Industrija Sanica, da li je pokrenuta proizvodnja i da li ministarstvo ima ikakve planove, kratkoročne, dugoročne, šta uraditi sa ovim privrednim društvom.

A drugo pitanje je isto ministarstvu privrede. Znači, u pitanju je TKA CAZIN, gdje smo mi prije par mjeseci prenijeli vlasništvo na Općinu Cazin.

Da li je potpisan taj ugovor i da li ministarstvo ima informaciju od Općine Cazin o realizaciji tog projekta i koji su planovi Općine Cazin sa ovim privrednim društvom?

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Hadžipašić, Vi želite kao odgovor. Vi ste uputili ovo pitanje njemu kao nadležnom organu. Izvolite onda. Pa nadležni organ, vjerovatno.

Poslanik Admir Hadžipašić:

Koristim priliku da iskreno poselamim i pozdravim sve prisutne u Skupštini kantona. Predsjedavajući, ja želim samo da kažem da bi ipak pojedini poslanici kad postavljaju pitanje trebali ipak prije svega držati do digniteta svog, a onda i ostalih poslanika u Skupštini. Iznositi ovakve insinacije, da ja kao poslanik, ili načelnik Općine Cazin, stojimo iza bilo kakvih, nekakvih radnji tamo koje neko obavlja bez dozvole, moram da kažem otvoreno da bilo ko od nas stoji vjerovatno bi taj neko dobio odobrenje. Ja imam informaciju da se to tamo dešava, ja sam građane koji su se meni obraćali uputio na nadležne organe, ja nisam nikakav inspektor, niti mogu vršiti bilo kakvu kontrolu. A isto tako pozivam Vas gospodine Prošiću da umjesto da slikate prostore tamo koje ste obilazili, da znači apelirate na inspeksijske organe da izađu na teren. Znači ako se to dešava da izvrše zabranu, ukoliko taj ko to radi nema odobrenje za rad. A ja koliko sam informiran i kako su mi građani prenijeli, da taj nema odobrenje za taj rad. Ja ne znam da li apsolutno to radi, nisam išao provjeravati tamo, ali bih zamolio sa ove znači govornice nadležne organe, prije svega Kantonalnu upravu za inspeksijske poslove da izvrše uvid u poslovanje i rad tog poduzeća koje je i registrovano za prikupljanje otpada, ali ne guma, koje obavlja te poslove. Ukoliko vrši spaljivanje guma, ako nema adekvatno odobrenje, da naredi zabranu. Odnosno može se zapečatiti taj prostor. Da se to ne može dešavati ukoliko to nanosi štetu građanima koji tu žive. Evo još jednom, apsolutno znači ove tvrdnje koje je iznio gospodin Prošić, niti ja, niti načelnik općine, ne stojimo, niti imamo bilo kakvog interesa u tom pogledu. Pozivam evo nadležne organe da izvrše kontrolu. Znači, prije svega upućujem to na Kantonalnu upravu za inspeksijske poslove, da trebaju izaći i ako se to dešava da izdaju zabranu, ukoliko to poduzeće nema odobrenje za to što radi.

Predsjedavajući Skupštine Unsko – sanskog kantona, Nijaz Hušić:

Nemate po pitanju ovog ni replike ni krivog navoda. Evo ja ću Vam dopustiti još sad samo da pojasnite nešto.

Poslanik Ekrem Prošić:

Prvo gospodine Hadžipašiću, Vi niste dobro slušali, ja sam rekao da sam dobio tu peticiju i te fotografije od strane mještana. Nisam ja slikao, ja ne živim tamo. Znači oni su mene, dozvolili da bude najgora, to su članovi A SDA pretežno i oni su se obraćali i Vama i načelniku i tražili od vas pomoć. Načelnik nije imao snage jer mu je navodno, tako je rekao njima, zaprijetio I CRNI da će povući neke svoje vjećnike iz vijeća, pa neće imati većinu u vijeću.

(PREKID IZLAGANJA)

Predsjedavajući Skupštine Unsko – sanskog kantona, Nijaz Hušić:

Kolega Prošiću, nemojte da se ponavljamo, odosmo predaleko.

Poslanik Ekrem Prošić:

A Vama kažu da su se obraćali, da si im rekao ti lično da: „Šta bi vi, tamo ljudi rade, vi bi da ti ljudi dobiju otkaz, da ne rade“.

Predsjedavajući Skupštine Unsko – sanskog kantona, Nijaz Hušić:

Ja Vam se zahvaljujem. Nemojte. Poslanička su pitanja. Vjerovatno evo kad dobijete odgovor na ovo poslaničko pitanje imaćete mogućnost da obrazložite, vjerovatno da komentarišete taj odgovor. Time smo završili sa zastupničkim pitanjima. Pojedini zastupnici su tražili odgovore odmah danas, ukoliko postoji mogućnost, postoji raspoloženje evo tri resorna ministra da daju odgovor, to Poslovnik naš omogućava. Evo prije svega ministar za pitanje boraca, Abid Mulalić. Dakle, ja Vas molim da kažete na koje zastupničko pitanje i kome odgovorate, da ne moramo onda kasnije mi u pismenoj formi to slati.

Ministar Ministarstva za pitanja boraca i ratnih vojnih invalida Unsko – sanskog kantona, Abid Mulalić:

Zahvaljujem. Uvaženi Predsjedavajući, zamjenici, zastupnici u Skupštini, kolege ministri, ostali prisutni.

Evo koristim priliku da dam odgovor na pitanje uvažene zastupnice Merise Šušić. Stipendije u ministarstvu za pitanje boraca i ratnih vojnih invalida za 2014-u godinu, evo pored svih ostalih obaveza koje smo zatekli u ministarstvu zatečena je i stavka obaveza stipendija za 2014-u godinu. 800 stipendija, iznos od 592.000 konvertibilnih maraka. Bila je obaveza i te stipendije su u potpunosti isplaćene. Znači, isplaćene su stipendije za 2014-u godinu. U budžetu za 2015-u godinu u ministarstvu za pitanje boraca i ratnih vojnih invalida na žalost nisu planirana sredstva za stipendije, zbog duga ovoga koji je bio za 2014-u godinu i koji smo tek evo isplatili prije nepuna dva mjeseca. Međutim, boračke populacije neće biti uskraćene na način da stipendije za 2015-u godinu su planirane preko ministarstva obrazovanja, a prioritet će biti boračke populacije u skladu sa pravilnikom o dodjeli stipendija. Zahvaljujem.

Predsjedavajući Skupštine Unsko – sanskog kantona, Nijaz Hušić:

Hvala. Adis Muharemović, ministar obrazovanja, nauke, kulture i sporta Unsko – sanskog kantona.

Ministar Ministarstva obrazovanja, nauke, kulture i sporta Unsko – sanskog kantona, Adis Muharemović:

Poštovani Predsjedavajući, zamjenici Predsjedavajućeg, Skupštinski poslanici, kolege ministri, cjenjeni gosti.

Ja ću iskoristiti priliku da odgovorim na pitanje uvaženog zastupnika Muslića i uvaženog zastupnika Jusića, a vezano za Područnu Školu Bućevci.

U budžetu Ministarstva obrazovanja, nauke, kulture i sporta na kodu rekonstrukcije i investicionog održavanja planiran je određeni iznos sredstava. Vlada Unsko – sanskog kantona na jednoj od svojih sjednica je razmatrajući raspodjelu ovih sredstava, na prijedlog ministra, donijela zaključak da se prioritarno iz ovih sredstava obezbjeđe sredstva za rekonstrukciju, odnosno izgradnju Osnovne Škole Bužim Podružna Škola Bućevci. Dakle, stvorene su sve pretpostavke da se krene u realizaciju ovog projekta, a ako Bog da iduće godine da otvorimo novu područnu školu u Bućevcima. Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Ministar finansija, Zikrija Duraković.

Ministar Ministarstva finansija Unsko – sanskog kantona, Zikrija Duraković:

Dame i gospodo prisutni, sve vas iskreno selamim i pozdravljam na početku svog izlaganja.

Prvo dopuna ovog pismenog odgovora što smo u prethodnom periodu uputili uvaženom poslaniku Hodžiću. Iz razloga što je pitanje Vaše bilo, zahtjevalo obiman materijal koji bi Vam trebali dostaviti, jer ste tražili isplatu cjelokupne subanalitike po svim grantovima. Iz tog razloga smo Vam uputili, jednostavno da nam dostavite mail adresu ili drugi način kako da Vam to dostavimo, jer je materijal stvarno obiman, kad bi se isprintao bio bi nepregledan i ne bi Vam bio, naravno mi ćemo izaći u susret i na ovaj način, da se to Vama skenira, uradi na CD i da Vam se dostavi.

Drugo pitanje bilo je pitanje uvaženog poslanika Veladžića, iz iste izborne jedinice, tako da ću ja ovdje iskoristiti priliku da Vam konkretno odgovorim. Što se tiče konkretno sportske dvorane Bužim, sredstva za tu namjenu po bilo kom kodu, po bilo kom osnovu, nisu planirana budžetom 2015-e. Znači, kako god nisu planirana, tako nisu mogla biti ni skinuta. I ni jedan pojedinac, ni poslanik, niti ministar, ne može samostalno vršiti izmjene u budžetu. To je moguće jedino uraditi na Skupštini, rebalansom budžeta. Znači, sredstva za te namjene nisu planirana ove godine, a mi ih nismo takođe ni zatekli u svim onim obavezama od 51 milion obaveza koji je evidentiran 31.12.2014. Znači, stavke za ove namjene, konkretno za sportsku dvoranu Bužim, nije zatečena obaveza da smo nešto dužni po tom osnovu. Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Time smo iscrpili poslanička pitanja.